



REPUBLIKA E SHQIPËRISË

**KOMISIONERI PËR TË DREJTËN E INFORMIMIT  
DHE MBROJTJEN E TË DHËNAVE PERSONALE  
DREJTORIA E HETIMIT ADMINISTRATIV**

Nr. 1422/3 prot.

Tiranë më 12.10.2018

**VENDIM**

Nr. 57, datë 12.10.2018

**MBI**

**ZBATIMIN E LIGJIT PËR MBROJTJEN E TË DHËNAVE PERSONALE**

Në mbështetje të neneve 29, 30 dhe 32 të Ligjit Nr.9887 datë 10.03.2008 "Për Mbrojtjen e të Dhënave Personale", neneve 77-112 të Ligjit Nr.44/2015 "Kodi i Procedurave Administrative të Republikës së Shqipërisë", si dhe provave të administruara në ngarkim të kontrolluesit Fondacioni "Faik Konica",

**KONSTATOVA SE:**

Në zbatim të Urdhrit Nr.228, datë 20.09.2018 të Komisionerit për të Drejtën e Informimit dhe Mbrojtjen e të Dhënave Personale, për kryerjen e hetimit administrativ, më datë 27.09.2018 grupi i inspektimit të Drejtorisë së Hetimit Administrativ filloi procesin e hetimit administrativ pranë kontrolluesit Fondacioni "Faik Konica", me objekt kontrolli:

- Zbatimi i Ligjit Nr. 9887 datë 10.03.2008 "Për mbrojtjen e të dhënave personale" i ndryshuar dhe akteve të miratuara nga Komisioneri, në lidhje me mbledhjen, përpunimin, ruajtjen dhe sigurinë e të dhënave personale, gjatë kryerjes së aktivitetit të kontrolluesit Fondacioni "Faik Konica".

Në funksion të Ligjit Nr.9887 datë 10.03.2008 "Për mbrojtjen e të dhënave personale" i ndryshuar, Fondacioni "Faik Konica", është kontrollues i cili mbledh dhe përpunon të dhëna personale të kategorive "punonjës/mësues", "nxënës" dhe "prindër".

Kontrolluesi Fondacioni "Faik Konica", është subjekt tregtar juridik, me NIPT: K71406451J.

Në datë 03.10.2018, grupi i kontrollit përfundoi hetimin administrativ duke e finalizuar me procesverbalin e mbajtur për këtë qëllim, prej nga u konstatua:

1. Kontrolluesi Fondacioni "Faik Konica", nuk ka "Njoftuar" pranë Zyrës së Komisionerit, mbi përpunimin e të dhënave personale në zbatim të neneve 21 dhe 22 të ligjit. Ky detyrim është përmbushur nga kontrolluesi në datë 02.10.2018, por megjithatë ka nevojë për më tepër informacion; **konkretisht rubrika 3**, është deklaruar se mblidhen të dhëna për nxënës dhe mësues, por në fakt duhet shtuar dhe kategoria prindër dhe staf administrativ/punëmarrës. **Rubrika 4**, duhet shtuar, nënrubrikat: Formimi, diplomat, Jeta profesionale, Imazhe nëpërmjet kamerave të CCTV. **Rubrika 7**, duhet saktësuar ku përhapen të dhënat personale, si p.sh.: DAR/ZA, MAS-i, Zyrat e Punës etj.
2. Kontrolluesi Fondacioni "Faik Konica", kishte rregulloren e mbrojtjes së të dhënave personale.
3. Në dosjet e personelit akademik/administrative, u gjenden të nënshkruara "Deklaratat e Konfidencialitetit" me punëmarrësit të cilët kanë akses në përpunimin e të dhënave personale, por këto janë sipas modelit të DAR/ZA. Çmuj se kontrolluesi duhet të pajisë me Deklarata Konfidencialiteti sipas standardit të Komisionerit punëmarrësit administrativ, të cilët aksesojnë të dhëna personale gjatë ushtrimit të detyrës së tyre.
4. Ambientet e brendshme ku kontrolluesi ushtron aktivitet janë të mbikëqyrura nëpërmjet sistemit të video-vëzhgimit CCTV. Konstatohet që ka tabela informuese mbi prezencën e sistemit të Video-Vëzhgimit CCTV, por nuk janë sipas modelit standard të kërkuar nga Komisioneri. Koha e ruajtjes së të dhënave në sistem është 30 ditë. Në ditët vijuese të inspektimit, u realizua nga kontrolluesi zëvendësimi i tabelave të mëparshme me modelin standard të kërkuar nga Komisioneri. Në klasat mësimore, të cilat nuk janë me më shumë se 20 nxënës ka kamera vëzhguese që monitorojnë gjithë procesin mësimor. Grupi i kontrollit e çmon të tepërt monitorimin e klasave, kur në to nuk ushtrojnë procesin mësimor më shumë se 50 nxënës.
5. Kontrolluesi, Fondacioni "Faik Konica", në faqen e tij zyrtare nuk ka të publikuar "Politikat e Privatësisë".

#### **Disa nga faktet e mësipërme përbëjnë shkelje administrative:**

- Konstatimi i pikës së parë përbën shkelje administrative të nenit 21 dhe 22 të Ligjit nr. 9887 datë 10.03.2008 "Për mbrojtjen e të dhënave personale" cili shprehet: "Çdo kontrollues duhet të njoftojë Komisionerin për përpunimin e të dhënave personale, për të cilat është përgjegjës. Njoftimi duhet të bëhet para se kontrolluesi të përpunojë të dhënat për herë të parë ose kur kërkohet ndryshimi i gjendjes së njoftimit të përpunimit, sipas nenit 22 të këtij ligji, të njoftuar më parë....". Përditësimi i njoftimit është një nga detyrimet më të rëndësishme ligjore i cili në vështrim të nenit 21 të ligjit, duhet të kryhet kur kërkohet ndryshimi i gjendjes së njoftimit të përpunimit, sipas nenit 22 të këtij ligji. Mos kryerja në kohë e këtij detyrimi, ngarkon kontrolluesin me përgjegjësi administrative të sanksionueshme sipas nenit 39, pika 1, germa "d" të Ligjit nr. 9887/2008 "Për mbrojtjen e të dhënave personale", me gjobë nga 10 000 deri në 500.000 lekë.

- Konstatimi i pikës së katërt, përbën shkelje administrative të nenit 18 të Ligjit nr.9887 datë 10.03.2008 “Për Mbrojtjen e të Dhënave Personale” i ndryshuar dhe Udhëzimit Nr.3 datë 05.03.2010 të Komisionerit “Për përpunimin e të dhënave personale me sistemin e video survejimit në ndërtesa dhe mjedise të tjera”.
- Konstatimi i pikës së pestë, përbën shkelje administrative të nenit 18 të Ligjit nr.9887 datë 10.03.2008 “Për Mbrojtjen e të Dhënave Personale” i ndryshuar. Informacioni i publikuar në “Politikat e Privatësisë”, duhet të ketë për qëllim informimin e subjekteve të të dhënave që vizitojnë këtë portal, mbi mënyrat e përpunimit të të dhënave, masat e sigurisë, ruajtjen e konfidencialitetit, të drejtat e subjekteve të të dhënave dhe detyrimet e kontrolluesit në kuadër të mbrojtjes së privatësisë.

Neni 18 i ligjit, shprehet:

“1. Kontrolluesi, kur mbledh të dhëna personale, duhet të informojë subjektin e të dhënave për fushën dhe qëllimin, për të cilin do të përpunohen të dhënat personale, për personin që do t’i përpunojë të dhënat, për mënyrën e përpunimit, përveç rastit kur subjekti i të dhënave është në dijeni të këtij informacioni. Kontrolluesi duhet të informojë subjektin e të dhënave për të drejtën për akses, si dhe të drejtën për korrigjim të të dhënave të tij...etj”.

Mos kryerja në kohë e këtij detyrimi, ngarkon kontrolluesin me përgjegjësi administrative të sanksionueshme sipas nenit 39, pika 1, germa “b” të Ligjit nr. 9887/2008 “Për mbrojtjen e të dhënave personale”, me gjobë nga 10 000 deri në 300.000 lekë.

Në zbatim të neneve 87-89 të Ligjit Nr. 44/2015 “Kodi i Procedurave Administrative të Republikës së Shqipërisë”, kontrolluesi Fondacioni “Faik Konica”, është njoftuar të marrë pjesë në seancë dëgjimore, e cila u zhvillua në datën 16.10.2018, pranë ambienteve të Zyrës së Komisionerit. Kontrolluesi është paraqitur në seancë dëgjimore për të parashtruar pretendimet në lidhje me shkeljet administrative të konstatuara në kontrollin e ushtruar pranë tij, dhe dokumenton se ka plotësuar:

1-Formularin e Njoftimit.

2-Vendosjen e tabelave informuese.

Nga grupi i kontrollit u verifikua mos publikimi i rubrikës “Politikat e Privatësisë”, nga kontrolluesi Fondacioni “Faik Konica”, edhe pse ky kontrollues ka pasur kohën dhe mundësinë për ta përmbushur këtë detyrim, para daljes së aktit përfundimtar të Komisionerit.

Kontrolluesi, Fondacioni “Faik Konica”, në formën ligjore të aktivitetit të tij tregtar, është person juridik dhe sipas nenit 39/2 të Ligjit nr.9887, datë 10.03.2008 “Për mbrojtjen e të dhënave personale” i ndryshuar, për kundërvajtjet e mësipërme administrative, dënohet me dyfishin e gjobës së përcaktuar në pikën 1 të këtij neni.



Për zgjedhjen e masës së gjobës, Zyra e Komisionerit ka parasysh faktin se, kontrolluesi ka dijeni për ligjin, por gjithashtu, ka parasysh faktin se, kontrolluesi ka reagues në mënyrë të menjëhershme në rikuperimin e disa prej gjetjeve të grupit të kontrollit.

Shkeljet e konstatuara janë serioze, (mos përmbushja e detyrimit për njoftim dhe mos informimi i publikut nëpërmjet rubrikës "Politikat e Privatësisë"), pasi ato lidhen ngushtë me garantimin e të drejtave të subjekteve të të dhënave personale, saktësinë që të dhënat duhet të kenë dhe kur është e nevojshme, ato duhet të përditësohen duke ndërmarrë çdo hap të arsyeshëm për të fshirë apo korrigjuar të dhënat e pasakta apo të paplota në lidhje me qëllimin për të cilin ato janë mbledhur apo përpunohen më tej.

### **PËR KËTO ARSYE:**

Në zbatim të neneve 18, 21, 29, 30, 39 pika 1, germa "d", si dhe nenet 40 dhe 41 të Ligjit nr. 9887 datë 10.03.2008 "Për Mbrojtjen e të Dhënave Personale" i ndryshuar,

### **V E N D O S A:**

1. Dënimin e kontrolluesit Fondacioni "Faik Konica", me gjobë në vlerën 20.000 (njëzetëmijë) lekë për shkelje të detyrimeve të përcaktuara në nenin 21 të Ligjit nr.9887, datë 10.03.2008 "Për Mbrojtjen e të Dhënave Personale".
2. Dënimin e kontrolluesit Fondacioni "Faik Konica", me gjobë në vlerën 20.000 (njëzetëmijë) lekë për shkelje të detyrimeve të përcaktuara në nenin 18 të Ligjit nr.9887, datë 10.03.2008 "Për Mbrojtjen e të Dhënave Personale".
3. Gjyko arkëtohet nga kundërvajtësi në Buxhetin e Shtetit, jo më vonë se 30 (tridhjetë) ditë nga komunikimi i këtij vendimi. Me kalimin e afatit të ankimit, ky vendim kthehet në titull ekzekutiv dhe ekzekutohet në mënyrë të detyrueshme nga zyra e përmbartimit.
4. Kundër këtij vendimi mund të bëhet ankim në Gjykatën Administrative të Shkallës së Parë, Tiranë, brenda 30 (tridhjetë) ditëve nga komunikimi i këtij Vendimi.

Ky vendim u shpall sot më 17.10.2018.

**KOMISIONERI**

**Besnik Dervishi**

